

Նոյնքան բնական է նաև, որ այդ պայմաններում, հայ ժողովրդի հայեացքն ուղղուէր դէպի Արեւմուտք եւ այնտեղից սպասուէր հարկաւոր օգնութիւնն ու պաշտպանութիւնը:

6.

Վերոյիշեալ պայմանները, Զուխայեցոց դեռ շատ առաջ, ստիպել էին հայ կեանքի դեկալարներէից ոմանց՝ մի ելք գտնել եւ հայ ժողովրդին իր ծանր վիճակից հանել: Այդ ելքը նկատուել էր Հայաստանի անկախութիւնը. իսկ միջոցը՝ Եւրոպայի, գլխաւորապէս Հռովմի, միջամտութիւնը:

Այսպէս. Յակովբ Զուխայեցոց ամբողջ մի դար առաջ Ստեփաննոս Ե. Սալմաստեցի կաթողիկոսն է հանդիսանում Հայաստանի անկախութեան գաղափարի առաջին ռահվիրան:

Մի «իմաստուն» եւ «գրասէր» մարդ էր նա, ծնուած Սալմաստում, բայց սնուած ու դաստիարակուած Պոլսում, «հմուտ բազում գիտութեանց եւ գիտակ բարբառոյ այլեւայլ ազգաց, եւս եւ լատինականին. որ եւ չըջեալ ի պատանեկութեան իւրում յաշխարհս հեռաւորս, մինչեւ յերկիրն լեհաց եւ մոսկովաց, առեալ էր տեղեկութիւն յոգունց իրաց» — այսպէս է ներկայացնում նրան Հ. Չամչեանը:

Նա դրականագէտ էլ էր եւ մի քանի աշխատութիւնների հեղինակ: Գրել է Յովհաննու Աւետարանի մեկնութիւնը, Քրիստոսի եւ Աւետարանիչների վարքը եւ այլ շատ գրքեր, «գորոց չունիմք տեղեկութիւն ի մասնաւորի» — ասում է նոյն պատմագիրը (Չամչեան, Գ. 517):

Ժամանակի այս աչքի ընկնող հոգեւորականը կաթողիկոսական աթոռը բարձրացաւ մի շարք դեղեցիկ ցանկութիւններով, որոնցից ամենաջերմն էր՝ «ճաղկեցուցանել բազում իրօք գաթոռն էջմիածնի»: Բայց դժբախտաբար ոչինչ չկարողացաւ անել, «խռովալից եւ դժնեայ» օրերի հանդիպելով:

Կաթողիկոսներից շատերի նման՝ սա էլ չկարողանալով միայնակ տանել աթոռի հետ կապուած դժուարութիւնները, իրեն աթոռակից ձեռնադրեց Միքայէլ Սեբաստացուն, «զայր հաւատարիմ եւ զգօն», կաթողիկոսութիւնը թողեց նրան եւ ինքը հեռացաւ դէպի Պոլիս (1547 թ.):

Բայց իր գլուխն ազատելու համար չէր, որ նա թողեց էջմիածինը: Ո՛չ. նա իր մտքում ունէր մի ծրագիր — Հայաստանի ազատագրութիւնը: Դեռ աւելի. նա գնում էր ոչ որպէս սոսկ անհատ, այլ որպէս պատգամաւոր պարսկական մասի հայութեան կողմից՝ եւրոպական արքունիքներում Հայաստանի ազատութիւնը որոնելու:

Հասկանալի է միանգամայն, որ ամենից առաջ իր քայլերը նա պիտի ուղղէր դէպի Հռովմ, ուր նստում էր «քրիստոնէութեան եւ բոլոր ճնշուածների» պաշտպանը, Քրիստոսի տեղապահը եւ Պօղոս-Պետրոս առաքեալների յաջորդը: Ուստի վերցնելով հետը մէկ արքեպիսկոպոս, մէկ եպիսկոպոս եւ այլ պաշտօնեաներ, Պոլսից ուղեւորւում է դէպի Հռովմ:

Չամչեանը այս ճամբորդութեանը տալիս է զուտ կրօնական բնաւորութիւն: Կաթողիկոսը «ցանկացաւ երթալ յուխտ սրբոյն Պետրոսի եւ Պօղոսի» — ասում է նա: Դեռ աւելի. հիմնրելով հռովմէացի պատմագիր Գուլարտեր Արեւտինոսի վկայութեան վրայ, աւելացնում է. «Եցոյց Ստեփաննոս զհպատակութիւնն իւր զոր ունէր առ սրբազան Պապն եւ զմիաձայնութիւն ի բանս հաւատոյ»: Բայց մոռանում է, որ մի քիչ վերեւում բերել էր նոյն Գուլարտերի խօսքերը Ստեփաննոսի մասին, որոնք բոլորովին այլ բան են ասում: Ինքը Գուլարտերը շատ մօտ է եղել Ստեփաննոսի եւ նրա ուղեկիցների հետ. յաճախ լինում էր կաթողիկոսի մօտ եւ մտերմական խօսակցութիւններ ունենում նրա հետ. բայց երբ խօսքը գալիս էր կրօնական խնդիրներին, «բազում եւ ծանր վիճարանութիւնք լինէին ի միջի մերում» — ասում է նա:

Պարզ է ուրեմն, որ, եթէ Ստեփաննոս կաթողիկոսի Հռովմ գնալու նպատակը եղած լինէր՝ իր հպատակութիւնը յայտնել Պապին եւ միաձայնութիւնը հաւատոյ գործերում, այդ դէպքում նրա եւ Գուլարտերի միջեւ կրօնական հարցերում այլեւս «բազում եւ ծանր վիճարանութիւնք» չէին լինի:

Միւս կողմից՝ անշուշտ Ստեփաննոս կաթողիկոսն էլ շատ լաւ գիտէր, որ այդ ձեւով երբեք չէր կարող հայոց եկեղեցու միութիւնը Հռովմի հետ գլուխ գալ: Այդպիսի փորձեր չա՛տ էին արուել, գուցէ չա՛տ կաթողիկոսներ էին Հռովմ գնացել, Հռովմի հետ բանակցու-